

# Pablotenipa Piripodenidsa ima teppe dosse quinajaro

## Filipenses

Piripopi dsama Masedoniacca odsa panani deni tojanicca. Pablopa nahihuaji Jesocristo tahimari maride tojapojari, pohua tesse Sila tedseje. Madija mota Jesodsa jehe quinaraha motapa Pablotenidsa jiperaquuri najari. Pablo Sila tedseje damama quinsadsapa inajidso-baquimanajari. Toponi cocorohuaji cororo idsimamanajari. Najaro imapi dsotodena Roca dsodo inajaro, Jesocca dodosse tabaqui tahimari capítulo 16<sup>da</sup> anijaro.

Nadsapa Piripocca toponi cocorohuaji huedenadsapa dsama onihihuaji huedaridsajari, Dio Atti maride. Dsotode Pablo pohua motta Romahuajicca toponi cocorodsa huedsadsapa Piripohuaji madimanajaridenidsa ajijaro ima teppe dsodo inajaro. Toponi cocorodsa ocasserani ahuaraha Diodsa huatidse-dsanapojari. Pocca dsodonijipi: Ocasserani eraha huajijiradsa Diodsara ehetidse najaro bica tani. Nanajidso iquejenaraha Jesocristodsa dissera inanijine.

Pablo pohua Diodsa dissera tajari pohua tahimari dsodo inajaro. Dio jipa tahiccara inananjine tohuini najari. Najaro ima naqui Piripodenidsa dsodo inajaro, pohuadeni naco Dio jipa tahicca tocatterahijine.

### **Pablo, Timoteo tedseje nija quinajari**

**1** <sup>1</sup>¿Nija imecotedeni? Ohuapi Pablo. Otesse Timoteo tedseje Jesocristocca medse iquejenani. Tienenidsa: –¿Nija, bicaquuri tiquinaqui? –inajaro. Aji odsa panani Piripocca Diodsa tiquejenajarodeni Jesocristodsa tijariquimanajaro tienenidsa ima dsodo inajaro. Titiqueriqui nanicca tiadeni maridedeni, tibijideni accodedeni huapimadsa naqui dsodo inajaro. <sup>2</sup>Aja icca Abi Dio tiadenidsa ima bicani inananjine, inajaro.

Tiadenidsa icca Abi Diocca jonehe, ia Medsede Jesocristocca jonehe naqui tiadenidsa tojanijine, inajaro.

### **Pablopa Jesocristodsa jehe quinajaridenitohui Diodsa huati huati najari**

<sup>3</sup>Aji Piripodsa timadimanajaro tiadenidsa obodi huatodsa Diodsa ohuattipi: –Jehe, pohuadenipa bicaquuri nadsapa ohuatidseni –ohonanajaro. <sup>4</sup>Diodsa huati huati onadsa naqui Diopa tiadeni tohuacahua-baquihitohui ohonandsapi ohuatidsejaro. <sup>5</sup>Aji \*Jesocristo tahimari icassiejeranijinecca

timittamanapodsama aji tiadeni ohua inadsa pohua tahimari deni tojanijine idsepe ijjaropaji. <sup>6</sup>Tiadenipi Jesocristodsa jehe tiquinapodsama Diojine tibodideni dsati tojajaro. Nadsama obodi nahato onajaropi Dio tiadeni acco tocamabaqqi-jonajaria Jesocristodsa paji jai tijarini dsanapodsapi nidsa Pohua ccanipomahicca huada bacco tiquinanitohui, onajaro.

<sup>7</sup>Tiadenidsa ohuati huana tadsa ajijaro ima obodi huatodsa huati onajaropi bica tani, onajaro. Najaroa aji todsepe ojadsa tiadenipi Diojine dacoco tijiradsa ohua acco ticamamanajaropaji. Nadsama dsama cacahuadedeni otohui huahua quinadsa occa ima: –Tabaccora tani –quinadsa naco occa ima mittamanahijine pohuadenidsa ohuacomerajarode: –Diocca ima Jesocristo tahimari tabaccora tejerani. Ima bicani icassiejera-nijinecca –onade pohuadenidsa. Tahide todsepe ojajeraccadsama naqui tiadeni tedseje nema inaridsapode. Diocca dacorehe iadsa anidsanapojaro. <sup>8</sup>Diopa obodi nahato tajaria Jesocristocca tohuati huanehema tiadenidsa ohuati huana tajaropaji. <sup>9</sup>Ohuapi titohuideni Diodsa huati huati ohonanajaro, tibodidenidsa Jesocristocca tohuati huanehe deni tojadsanaponijine. Nani imecote Jesocristodsa pajissa quinajarideni tedseje tetideni cahanerara canadsapi ticcadeni tohuati huanehe madija huapimadsa tojaribaqqinijine. Nani Diojine tibodideni tohuattajaroma tetideni huanaququiri nanijine. Nadsapi Diocca marinaja tadsajani tibodideni huatonissa tadsa ima bicani

ticattejidsamananijine. Najaro ima tadsajani madijadsa tetideni huanaququiri nanijine, ohonanajaro Diodsa. <sup>10</sup>Nani ima bicani tocattejidsade nahatoququiri tiquinanijine. Bica taniccatohui jipaqquiri tiquina-dsapi tibodideni tossajani nanijine. Ima bicani tinanamanadsapi nidsa Jesocristo ccaronapomadsa: –Ticcadeni ima tabaccora tani –najarahijine, onajaro. <sup>11</sup>Ticcadeni madiedsa Jesocristojine ima bicani huapi tehe ahuato tadsapi madija qqi toquinadsapa: –Jehe, Diopa nahato tahi, deni tojahi –quiquina-nahijine, ohonanajaro Diodsa.

–Occa camittehepi  
**Jesocristocca. Aji namidsa  
 omadiccadsa naqui pohuadsara  
 ohuatidsena –najari Pablo**

<sup>12</sup>Jehe ohuemecotedeni, ajijaro ima timittamanaji: –Jesocristo tahimari jicanijine –quinadsa ohua nanajidso inanaridsamanajaropi aji Jesocristo tahimari icassiejera-nijinecca deni tojaridsajaropaji. <sup>13</sup>Najaria tamine pocca odsahuajicca soldadodeni naco occa ima



nahatoto tajaria aji Jesocristo tahimari mari mari onaridsajaro-jine todsepe ojaropaji. Najaria madija motadeni naco otahimari nahatoqquri najaripaja. <sup>14</sup>Najaria Jesocristodsa toquejenaridenipa todsepe oiani otahimari nahatoqquri najaripaja. Naraha ohuapi ocasserani ohuaraha ohuatidseni. Najaria aja mota huapimapa paja tohuatidsemanarihi najari-paja. –Iadsa naqui ia Medsedecca dacorehe anini. Ia naqui ima inahananjine ipajirani –quina-jaripaja. Najaria aja pocadeni cappinehe jicadsapi Dio Atti denima mari icanaridsabaqqui-manajari-paja.

<sup>15</sup>Naraha Jesocristo tahimari maridedeni ohuahadenipa aji ohua Dio Atti mari ocanaridsabaqquijari acconia ohuadsa jiperaqquri najari-paja. Puhuadani attipa: –Jidapapi iana deni iquejenanitohui –quiquinanajari. –Jidapapa Pablo coro todsimahi. Nadsana ettidsa madija huatidsemana-pomahitohui –quiquinanajari. Naraha Jesocristo tahimari maridedeni motapa bodideni bicaqquri nadsa Dio Atti maride toquejenaridsajari. Najaria Jesocristo tahimari maridepa denima todissesserahi najaripaja. <sup>16</sup>Ohuadsa huatideni huanacquiri najaripa: –Pablopa todsepe tojara-ha iana Jesocristo tahimari ecomeranitohui –quiquinanajari. Bodideni nahatoqquri nadsa attidenipa: –Diopa Pablo icadossejari, Jesocristo tahimari icassiejera-nijinecca deni tojanijine –quiquinanajari. <sup>17</sup>Naraha Dio Atti maridedeni mota pamahapa bodideni bicaqquri najararaha puhuadani

deni tonanamanahijine Jesocristo tahimari mari mari quiquinanajari. Occa cacahuehe aji Dio Atti mari mari onajaro acconi attideni ajama quiquinanajari: –Pablopa toponi cocorodsa ijine Jesocristo tahimari tojaridsani mittadsapa pocca cacahuehe acconi ojihitohui –quiquinanajari. <sup>18</sup>Naraha ohuapi epejena. Dio Atti maridedeni ohuahapa ohuadsa huatideni huanana taja, ohuahapa ohuadsa huatideni huananera taja naraha Jesocristo tahimari tojaridsani ima omittadsapi ohuatidsejaro. Jesocristo tahimari maride motadenia Jesocristocca deni tojehe ahuato inanananjine maride toquejenaridsajari. Naraha Jesocristo tahimari maride motapa puhuadani deni tonanamanahijine maride toquejenaridsadsa naco epejena. Jesocristo tahimari tojaridsadsapi ohuatidseni.

<sup>19</sup>Jehe, ohuapi obodidsa nahato onajaro. Tiadenipi Dio ohua cacahuhijine Diodsa huati huati titidsanapomana najaro. Obodi nahato onajaro. Jesocristo corimepa ohua acco camahi, ohonanajaro. Nema nadsapi aji ima huapima ohuadsa anijaro tobicanitohui onadsa ohuatidsejaro. <sup>20</sup>Ohuapi Jesocristo tahimari huatide naqui ocappina-jeranitohui. Jidapana naqui ocassera tanidsa omadiraha Jesocristocca ima ohuacomera-dsanaponitohui. Nema onadsapi Jesocristocca nahatohue ohuadsa anini madija ohuahadenidsa ahuato tanitohui, onajaro. –Jehe, Jesocristojine cappina-jarajari –quinadsapa Jesocristo tahimari tossiejehecca mittamanahitohui. Pina aja Dio Atti mari mari ocanabaqqui-pojarissa onanabaqquina, onajaro.

Jesocristocca deni tojehe ahuato dsanaponijine odsoqquedsa naqui bica tani. Ossiajaccadsa naqui bica tani, onajaro. <sup>21</sup>Occa camittehepi Jesocristocca daniji. Ajijaro namidsa omadiccadsa naqui pohuadsara ohuatidse-dsanapoccani. Nidsa odsoqquedsa pohuahuai omadidsapi denima ohuatidsenitohui. <sup>22</sup>Naraha aji namidsa omadi-dsanapodsa Jesocristo tahimari ohuacomeraridsanijine naqui bica tani. Nahi madija denima Jesocristodsa jehe quina-dsapa tocassiejerahijine. Nadsama odsoqqueni naqui bica tani. Ossiajadsa naqui bica tani. ¿Nejecoma nanina bica tani? onajaro. <sup>23</sup>Ohuapi: Ajima onanina bica tani, onanijinepi ssamo onani. Odsoqquedsa naqui jipa onani. Odsoqquedsapi Jesocristohuai omadinijinena ohuadsa denima bica tani. Pohuahuai omadidsapi ajijaro namicca ocasserehe ohuadsa nohueranitohui, onajaro. <sup>24</sup>Naraha Jesocristo tahimari ticahatteranissa tejeraccani. Denima tiadeni maride omadi-dsanaponijinena bica tani. <sup>25</sup>Jehe, nema nadsapi obodi: Ajijaro namidsa Dio ohua namadidsanapocchitohui nahato onani. Tiadenidsa omadi-dsanaponipi ticcadeni jeheniji todacorani nanijine. Pohuadsa tidacoramanani nadsapi tibodideni pocca huatidsehema denima tetidsemanadsanaponitohui. <sup>26</sup>Jesocristocca marinaja denima tiadenidsa tojaridsadsa pohuadsa tetidsemanadsapi: –Jehe, Jesocristopa bica tahi –tiquinanitohui. Tiadenidsa omadi-pomadsapi Jesocristodsa denima tetidsemananitohui, onajaro.

<sup>27</sup>Nadsama ohuapi odsoqqeje odsoqqejeje nanitide. Tiadeni qquide naqui oqqeje oqqejeje

nanitide onadsa tiadenira pina Jesocristocca marinajassa tinamanadsanapona, onajaro. Tiadenihuai bacco onadsa bacco onejeradsa naqui ticcadeni ima bicanira omittadsanaponijine. Tijinedeni ima ajima dsanaponina bica tajaro: Huapima tijariquimanadsa Jesocristo tahimari icassiejeranijinecca tinebomanajeranijine acco acco ticanaji. Dacoco tijirehe nema tidsanapomanaji, nahi Diodsa jiperaquiri najarideni attidenidsa tijaparimana-jeranijine. <sup>28</sup>Tiadenidsa huadiquiri najarideni noppinedeni ticappinamana-jeraji. Nema tiquinadsapi pohuadenidsa ahuato tanitohui: Pohuadenipa najidsohue jiquejerenihuai toquejenahitohui. Naraha tiadenipi ticassiejeranijine. Najaroa Diojinena paji. <sup>29</sup>Diopa tiadenidsa ima bicani inanajaro. Najaroa Dio Pohuajine tibodideni huatodsapi tettideni: –Jesocristopa occa imasiri manaconidsoqqeje. Jidapapi pohuadsa pajissa onani –tiquinajaropaji. Diopa ima bicani onihi tiadenidsa inajaro. Najaria aja Jesocristo ocasserani ahuapojaripaja. Nadsama ia naqui Jesocristo tahimari tojaridsanijine ocasserani eridsadsa bica tani. Najaro imadsapi etidsejaro. <sup>30</sup>Tiadenipi pina aji ohuassa tiquinajaro. Jesocristodsa huadidi tajarideni tiadenidsa jara jara quiquinanahi. Aji poccadeni jarehe onahanapojarodsapi ja ojajerade ohua qqui tiquinade. Jidapana naqui poccadeni jarehe onahana-dsanaponicca ima timittamanajaropaji.

### Jesocristo ajamani tojaraha deni tojajari

**2** <sup>1</sup>Aji Jesocristodsa tiquejenajaropi tiadeni tonahatidsebaquuihi. Pocca tohuati huanehe

ticajiridsamanadsapi tibodideni ocassera taraha pohuajine tetideni ssonani nahatoqqiri tiquinajaro-paji. Dio Corime tibodidenidsa tojadsa naco pohuadsa tijari-qquimanajaro. Najaroa madija catidsede ticahattera, tohuati huanehe ticahattera najaropaji. Najaro ima huapima tiadenidsa tojadsapi ohuatidseni. <sup>2</sup>Denima ohua tinahatidsemananijinepi ajima tiquinaji: Aji Jesocristodsa tique-jenajaro huapima ticajonerara canadsa timadimanadsapi ohuatidse-nitohui. Pocca tohuati huanehema tetideni cahanerara canadsapi ohuatidsenitohui. Huapima jehe ticanirere canadsa: – Jesocristo tahimari ahuato inanana –tiquina-dsapi ohuatidsenitohui. <sup>3</sup>Naraha tibodideni: –Ohuana ima bicani onanadsa deni ojana –tiquine-jeraji. Ima bicani tinanamana-nijinepi: –Diocca deni tojehera ahuato dsanaponijinena bica tani –tiquinaji. Tettideni naqui: –Ohua motta Dio Attissa onananijine opajirani –tiquinejeraji. Tettidenipi: –Dio ohua acco camadsana opajirani –tiquinanina bica tani. –Ohuana denima nahato onajaro –tiquinejeraji. Timecotedeni naco tohuattehe cajiridsamanahi. –Pohuadeni naco deni tojehecca cajimanahijine bica tani –tiquinaji. <sup>4</sup>Tiadeni tiadenira tinanabicamanaanijine ojari-gerana. Timecotedeni naco pohuadeni tonanabicamanaanijine acco ticamabaquimanajo. <sup>5</sup> –Ohuapi ajimani ojani bica tani –tiquinadsapi tibodideni pina Jesocristo bodi huatomajarissa tiquinajaro. Nema tiquinani bica tani.

- <sup>6</sup> Jesocristopa Diossa najari. Imehidsa madipodsama Imehicca deni tojehessa najaro cajijari. Naraha pohuapa: –Ohuapi Abi Diossa onani. Deni ojani –najarajari. –Occa mamadi bicani onebo-gerana –najarajari.
- <sup>7</sup> Nadsapa pocca deni tojehe inebocossa, pohua madihicca bicani inebocossa nadsa pina aja iassa naha amonejedsa tossonajaripaja. Nadsapa pina \*medse dodosse tojararissa naha tojajari.
- <sup>8</sup> Pohuapa pina iassa naraha pohua tohuini nahicca inana-gerajaro. Imehicca dossenijidsana ibora tajari. Najaria Imehi Attipa Bedidsa: –Madija tinassia-jabaquina –najaripaja. Imehi Attidsa ibora-dsanapojaria aja ahua porimacossanidsa inandsoqqe-manajaripaja. Nadsama porimacossanidsa dsodsoqqemana najaripa oppina tanicca. Najarodsapa madija bobotide, madija pohua tesse inandsoqqe-geridenina, dsodsoqqemana najari. Naraha Jesocristopa nama najararaha najaro porimacossanidsa inandsoqqe-manajari.
- <sup>9</sup> Najarodsapa ibora tadsapa Abi Dio Pohua Bedi Jesocristo deni inanajari. Memecca huapimadsa, namicca huapimadsa pohuana denima bica tajaripaja. Najaria Abi Dio Pohua Bedi Jesocristo oni icanacanidsapa

madija huapimadsa Jesocristo onina deni tojaridsajaropaji.

<sup>10</sup>Nadsama nidsa dsama jicadsa Jesocristo oni mittamana-dsapa memehuaji madiridsa-manajarideni, namihuaji madiridsamanajarideni tedseje, nami bodihuaji animanajarideni naco aja Jesocristodsa jehe quina-jarajardeni jicapojari, Satana pocca dodosse tabaqquma, huapima Jesocristocca daco-rehejine cappinamanadsapa: –Jeso deni tijani –quina-hijine pohuadeni pitodsa jassi tahitohui.

<sup>11</sup>Nadsama huapimapa: –Jehe, Jesocristopa ia Medsede, huapimacca tamine –quinahitohui.  
Abi Diodsa naco: –Bica tinani, deni tijani, tijani –quinahitohui.

**Jesocristodsa toquejenaridenipa ajijaro dsamacca dsidsinidsa pina jojororo ssiaja tajarissa quinajari**

<sup>12</sup>Ohuemecotedeni, tiadenidsa ohuati huana tani. Jesocristo tahimari huajjiradsa tiadeni mari mari ohocanaqaqqi nadsa iboraqquri tiquinade. Naraha jidapapi tiadenihuaji omadi-jeradsa naqui denima Jesocristocca marinajadsara iboraqquri tiquinana. Pohuajine ticassiejeranijinepi madie dsati ticajimanani. Dio Corimepa tibodidenidsa madiridsahi. Diocca ejedeni tiquejenani. Najaro ima tossamo-geranijine Dio noppine ticappinamanadsa mohuaradsa timadimananissa taji. <sup>13</sup>Aji tibodideni

ima bicani tohui tiquinajaropi Dio Pohuajine. Pohuapa tiadeni acco acco totocamabaqqi najari, ima bicanira tinanamana-dsanaponijine. Dio Pohua jipa tahiccara tinanamananijinepi Pohuadsa bica tajaro.

<sup>14</sup>Nadsama Dio jipa tahicca tinanamanadsa, timadimananica huapima tinanamanadsapi jami-mana tejeradsa tidsepedeni iji-manaji. Timecotedeni tedseje ahuaji atti ahuaji atti tiquinejeraji. <sup>15</sup>Nahi Jesocristodsa jehe quina-jarajardeni tiadenidsa: –Tabaccoraqquri nahi –quina-jarahijine. Tibodidenidsa imasiri quejema-gerani ima ahuato tanijine, onajaro. Diocca ejedeni tiquejenajaropi tiadeni tecahuamananissa taji, imasiri tinanamana-geranijine. Naraha Jesocristodsa jehe quina-jarajardenipa ajijaro namicca ima tohui quinadsapa tabaccoraqquri najari. Bodidenidsa huananehe ijijaro. Pohuadenipa dsidsinidsa madiridsamanajari. Naraha tiadenipi pina abadsico bedi dsidsinidsa ssiaja tajarissa tiquinajaro. <sup>16</sup>Nani tijinedenina Jesocristo tahimari icassiejeranijinecca ima ahuato-ridsaponi nanijine. Nahi Cristo ccanipomadsa ticcadeni ima nahato onadsapi ohuatidsenitohui. Pohuama Dio Atti mari ocanaridsabaqquide onejeranijine. Jesocristodsa quequeriquimana nahihuaji ima cattemade ponima ja odade onejeranijine. <sup>17</sup>Jesocristodsa jehe tiquinajaro ticcadeni madie Diodsa teccoramanageropaji. Najaroa ticcadeni da naqquinaja Diodsa da tiquinajarossa najaropaji. Diodsa tidsepedeni ihijimana najaro naqui Diodsa teteccoramana najaropaji.

Nadsama ohua naqui Jesocristo tahimari ohuacomera-ridsajaro acconi ohua inanadsoqqe-manadsa odsoqqeni bica tani. Occa madijepi pina occa daniji Diodsa dada onajarossa najaro. Nadsama ticcadeni daniji Diodsa denima pajirani-ssa tanijinepi occa daniji, ticcadeni tadsajani quejemadsapi ohuati-dseni. Occa huatidsehe tiadenidsa tojadsapi huapima etidsenitohui.<sup>18</sup> Jehe, ohuadsama tetidsemanaji, onajaro.

### **Timoteo Epafroditodeni tahimari**

<sup>19</sup> Jehe, ia Medsede Jesocristo jipa tadsa ticcadeni imatohui nahi Timoteo dosse onahitohui. Nidsa ahuaji ccanipomadsa ticcadeni ima huati nanidsana ohuatidsenijine.<sup>20</sup> Timoteopa pina obodissa najari. Tiadenidsa huati huana tajari. Madija ohuaha Timoteossa najari nohuerahi. Najarina titohuideni bodi huato-dsanapojari.<sup>21</sup> Naraha imecotedeni motapa pohuadeni poccadeni madieccara bodideni huatomanajari. Pohuadenidsara dsepedeni ijimanajari. Jesocristo tahimari tojaridsanijinepa bodideni huatomana-jarajari.<sup>22</sup> Naraha Timoteona Jesocristocca ima deni tojanijine dissera tajari. Pocca ima nahatoqquri tiquinajaro. Pocca madie bica tanicca tiadenidsa ahuato tade. Pohua tedseje Jesocristo tahimari icassiejeranijinecca ecomeraridsapsapi ohua acco camajari. Pina dsabisso imehi biji acco icamajarissa najaride.<sup>23</sup> Timoteo tiadenihuaji dosse onahijineraha obodipi nidsa oqqenanicca ima omittaccana, onajaro. Nahato

onadsana pohua dosse onahitohui.<sup>24</sup> Naraha ohua naqui onajo-jerani. Tiadenihuaji occabote nani. Ohua Medsede pajissa ohua acco camahitohui, onajaro.

<sup>25</sup> Nadsama imecote Epafrodito naco aji ohuedsanihuaji dosse tajonamanajari obiji accode. Ajadsa madimanajarideni ohuahuaji jajahijona nadsapa Epafrodito tedseje mari mari ihicanabaqqi najari. Madija motapa Jesocristo tahimaridsa jidsa jidsa quiquinanaraha Epafrodito tedsejepi japariri inejerade. Diocca dacorehema Jesocristo tahimari ehecomera najaro. Naraha jidapapa tiadenihuaji dosse onanibote nahi.<sup>26</sup> Pohua attipa: –Occa madija qqui onanibaqqina –nanaja najari. Epafrodito coma tahicca ima timittamanadsa pohuatohui oji oji tiquinajaro ima pohuadsa bacco najonadsapi titohuideni bodi huatoto canajari.<sup>27</sup> Pohuapa pajissa coma tadsa huatiabote najaride. Naraha Diopa pohuadsa huati huana tadsa inanomijaride. Diopa ohuadsa naco huati huana tajarijine: –Epafrodito dsoqqe-jarana –najari. Nassa dsoqqedsapa oji onajarojine denima obodi ocassera taneje onade.

<sup>28</sup> Nadsama Epafrodito naco tiadenihuaji dosse onanijine jipa onani. Tiadenihuaji jidsera tanidsapa tetidsemananitohui. Nadsapi ohua naqui ticcadeni ojinijidsa obodi huatoto canejeranijine, tiadenidsa bacco tanidsapa, onajaro.<sup>29</sup> Tiadenihuaji bacco tanidsapa tetidsemanana. Pohuapa timecotedeni Jesocristocca. Madija pina Epafroditossa quinajarideni Jesocristo tahimari maride

jahiridsahi caji tahi. Pohuadenidsa naqui tetetidsemana naji, attideni naqui timittamananissa taji. Tiadenihuaji bacco najonamanadsa naco acco acco titicamabaquimana nana, onajaro. <sup>30</sup>Epfroditopa ohua acco camajari. Jesocristo tahimari maride dsepe ijidsa huatiabote najaride. Huaji tanidsa timadimanasapi ohua acco ticamamananjine ssamo taraha Epafroditona ohuadsa dosse tajonamanadsapa pohuana ohua acco camade tojajari. Pahuapa aji oppina tanidsa madiraha ohua acco camade bica tajaride.

**Jesocristojinena Diodsa  
bacco inanijine**

**3** <sup>1</sup>Ohuemecotedeni, ia Medsede Jesocristodsa tetetidsemana naji. Occa marinaja tiadenidsa dsodo onapojarocca tiadenidsa dsodo omanipomajaro. Dsodode ohuadsa najo tejerani. Nani Jesocristocca marinaja tetideni ajimamana-geranijine, nani ima onihidsa jiperaquiquiri tiquinanijine. <sup>2</sup>Paji, tetideni huatoji. \*Jodiodeni motapa Jesocristodsa jehe tiquinajarocca ima tossamonijine titohuideni tonacombaquiqui. Pohuadenipa tabaccoraquiquiri nahi. Poccadeni marinajapi: –\*Huissinaja ticappiramanadsapi ticassiejera-geranitohui –quiquinanajari. Naraha najaropi pajissa jerani. Paji, pohuadenidsa pajissa tiquinadsapi ponima timedeni huissi nadsa biquerarana. <sup>3</sup>Naraha iana marinaja pajissaccadsa iquejenajaro. Ibodicca imasiri jeo tehe jicadsapi pina huissinajassa nehe icajijaro. Dio Corime ibodidsa madijarijine Dio Pohuadsa

ehetidse najaropaji. Jesocristodsa iquejenajaropi etidseri neneje najaropaji. Ettipi: –Imedsa huissinaja icajijarohne icassiejeranitohui –inejerani. Jodiodenicca marinaja jadanipi dacorehe cappirani. Jesocristona dacorehe cajijari. <sup>4</sup>Naraha jodiodeni mota ima bicani cajimanadsapa: –Jehe, Diohuaji bacco onanijine opajirani –quina-rahua ohuana ima denima bica tanicca ocajipojaro. Aji ima bica tanicadsa ibodi tobicadsapi nassa obodi tobicaponeje. <sup>5</sup>Nadsama otahimaripi ajima najaro: Ossonadsa huada 8 nadsapi huissinaja ocajijarode. Huissinaja ocajijaropi pina Diocca dosseniji tahideccassa najaro. Ohuapi Isaraeri potemahi omani. Idi Isaraericca ejedeni Benjamin potemahidenia aji ohuapaji. Ohuapi pajissa jodio madija omani. Occa abi, occa amideni naco jodiodeni. Jodiodeni atti \*ebreo nahatoquiquiri inajaro. Nadsama \*marinaja onini pariseodsa jehe onadsa naqui Moisesicca marinaja tadsajani quejemaniccadsa dissera onapojarode. <sup>6</sup>Nadsama ohua jodiodenicca marinaja onapajiranissa tanijine dissera onadsapi Jesocristodsa quequeriquimana najarideni ohonajidsobaquiqui najaride. Moisesicca marinaja, jodiodeni mamariri najari ohuacahuanissa tadsapi madija huapima otahimari mittamanadsapa: –Tijine dsori tejerani –quiquinanade. <sup>7</sup>Jehe, aji ima huapima ohuacahuapojaropi ohuadsa bica tade. Naraha Jesocristocca ojadsapi jidapana ima tahideccadsa: Deni tojani-cca onejerani. Paji oneborini.



<sup>8</sup>Aji ohuadsa ima deni tojapojaropi jidapana ohuadsa pina nohuera-jarossa nani. Jesocristodsa ojarocca imana ohuadsa denima bica tani ojari najaro. Jidapapi Jesocristo tohuina onadsapi occa ima tahideccadsa occa madija: –Bica tani –quiquinanajaripa oneboridsehe jicani. Pina dsamatapa tabotto nebojarissa nani. Jidapapi Jesocristodsa onocco tojidseradsanaponijine tohuini onajaro. <sup>9</sup>Jesocristocca ojadssapi pohuadsa omadi-dsanaponitohui. Tahidepi Diocca dosseniji jodiodenidsa anipojaro ohuacahuapjarode. Najarodsa obodi tobicanitohui ohonanaraha, ohua Jesocristocca ojararopi Diocca dosseniji jodiodenidsa anipojaro jirehe pohuadsa ojararode. Pocca ojadssapi pohuajine Diodsa bica onani. Jidapapi ohuatti: Pajissa Jesocristo occa imasiri manaconi tojajari onajarojine ohuadsa Dio Attipa: –Occa Ejedenisda pajissa tadsapi ticca ima ohuadsa bica tani –najari-paja. <sup>10</sup>Nema najaro Jesocristodsa onocco tojidseranijine jipa onajaropaji. Pohuapa dsoqqueraha nahatonijari. Najaro nahatoniecca dacorehetohui onadsapi: Najaro dacorehe ocajina, onajaro. Jesocristo ocasserani ahujaridsa ohuati huana tadsapi ohua naqui pina pohua ocasserani ahujarissa onana, onajaro. Pina pohua dsoqquejarissa najaro onahananijine jipa onajaro. <sup>11</sup>Jesocristodsara dissera odsanapona onajaropi nidsa Djoline Jesocristodsa toquejenarideni nahatonimanadsapa ohua naqui pohuadenidsama onahatoninijine, onajaro.

### Diocca madietohui idissesserani dsanapona

<sup>12</sup>Ohuapi Jesocristocca madiedsa opajiranissa tanijinepi pocca nahatonietohui dissera, pocca dacorehetohui dissera, obodi tobicanissa tanijine tohuini dissera onaraha najaro ima huapima bacconanissa tani onejerajaro. Naraha ohuapi Jesocristocca imatohui dissera onaccani. Tahidepi Jesocristo pohuajine Diodsa ojararo. Pohuajine pocca dacorehe, pocca nahatonie, pocca biquehe ohuadsa tojajaro. Pohua tahimari mari ocanabaquihijine naqui ohuadsa inanajaro. Nema odsanaponijine dissera odsanapona, onajaro. <sup>13</sup>Ohuemecotedeni, ohuapi Jesocristocca dossenijidsa opajiranissa tani onejerajaro. Occa ima tiadenidsa huati onana. Onattihuajicca imapi ohuati ajimanissa tani. Jidapapi otedsejemacca ima Diocca madietohui onadsa odisserani najaro. <sup>14</sup>Ohuapi Diohuaji omadinotohui onadsa, ima bicani onaninijinera obodi huatoni ojari najaro. Diohuajina Dio pocca daniji ohuadsa tojanijine, onajaro. Jesocristocca iquejenararopi Dio itohui huahua najari, pocca madiedsa ipajiranissa tanijine. Nidsa Diohuaji bacco inadsapi pocca daniji camittehe jiquejeranicca iadsa tojanitohui. <sup>15</sup>Aji huapima Jesocristo pohuadsa jehe inanissa tajararopi pohuajine ibodi tohuiridsadsa ibodi huatodsapi ajima inanina bica tani: Diocca madie tohuira idacacorani nana. Timecotedeni motapa: –Iapi Jesocristodsa ipajiranissa tani.

Iceca madie denima ibicanijinepi nohuerani – quiquinanaraha Diona bodideni cacajiquimerahijine acco icamabaquihitohui. Diocca madie tohuira denima todacocorahi nahijine. <sup>16</sup>Naraha iapi ajima inana: Pina aji Dio Atti imittaridsajarocca imassa inanadsa imadiridsana.

<sup>17</sup>Ohuemecotedeni, tiadenipi occa madiessa tinanamanaji. Najaroa aji ia Dio Atti maridepi Diotohuira idissesserani najaro-paji. Madija poccadeni madie bica tani qqui tiquinadsapi najarossa tinanamanaji. <sup>18</sup>Nadsa tiadenidsa madija ohuahadenicca ima huati huati onapode. Poccadeni madipepi bica tejerani. Aja Jesocristo ahua porimacossanidsa dsoqquejaricca imadsapa jipepera tahi. Poccadeni ima tiadenidsa huati omani-pomadsapi oji onabote nani. Paji, pohuadenissa tiquinejeraji. <sup>19</sup>Pohuadenipa poccadeni imadsa nama dsanapomanadsapa najidsohue jiquejeranihuaji toquejenahitohui. Pohuadeni tohuini quinajarina pina poccadeni diossa najaro. Najarodsara huatidsemanajari, pina jijipa tohuira, huananehe tohuira, dsedse coma tanicca tohuira quinjari. Pohuadenijine ima tabaccora taraha nama naha pohuadeni nanahatidsemana najari. Poccadeni imajine jabojerimanahina bica taraha naraha pohuadenipa najaro imadsa cappinamana-jarajari. Ajijaro dsamacca tohuira bodideni huahuatoma-mana najari. <sup>20</sup>Naraha iapi memehuaiji Dio madihicca odsa pananicca madija iquejenani. Nahi memehujicca ia Tonassijadepa itohui ccaronapomahitohui. Najaripa ia Medsede Jesocristo.

Pohuatohui imadijaro. <sup>21</sup>Nidsa Jesocristo ccanipomadsapa pohuajine ime cacajiquimeranitohui. Aji essirepi jadsidsi tani, imasiri icajije najaro. Naraha nidsa inahatonidsapi essire jadsidsira tanicca icajinitohui. Pina Jesocristo memehuaiji pohua assire bicabote cajijarissa najaro icajinitohui. Jesocristopa dacorehe cajijari. Najaro pocca dacorehejine namihujicca, memehujicca huapima dossede tojajari. Najaro pocca dacoreheda essire cacajiquimeranitohui.

#### Ia Medsedesa tetetidsemana naji

**4** <sup>1</sup>Nadsama ohuemecotedeni, Jesocristodsas disseraqquri tidsanapomanaji. Titohuideni ohuati huana tani. Tiadeni qqui onabaqqi-ccaraho ohonanan naraha oqqena-jeraccani. Maittaccadsama Dio Atti tiadeni mari ocanabaqqipodsapi Jesocristo tahimaridsa jehe tiquinade. Pohua tahimaridsa timadimananissa dsanapodsapi ohuatidsejaro. Tiadenipi occa cacatidse tabaqqi tiquejenani. Najaroa pina mari mari onadsa occa marinaja manaconi ohuadsa tojajarossa tiquinajaropaji, Diojine.

<sup>2</sup>Ohuemecote Ebodia, Sitique, tiadenidsa naqui dsodo onajaro. Jesocristo pohua imecote tiquejenadsapi pina tipamehe jehe ticanirenissa taji. <sup>3</sup>Nadsama otesse Dio Atti maride tia tedseje ihicabera najarodsas dsodo onajaro. Ebodia, Sitique ponideni acco ticamabaqqi, queberanissa tanijine. Jesocristo tahimari icassiejeranijinecca maride occaridsasapi ponideni pamehe ohuinoridsa

dsapanideni ijrirdsamanajaro. Otesse Clemente, otesse ohuahadeni inadsa Dio Atti maride iquejenadsapi ponideni naqui ohua acco icamamanade. Pohuadeni oni huapimapi \*camittehe cajimana-dsanaphuijinecca papeodsa dsodo nani anini.

<sup>4</sup>Huajjiradsa ia Medsededsa tetetidsemana naji. Tiadenidsa huati omanipomajaro: Ia Medsededsa tetetidsemana naji, onajaro. <sup>5</sup>Ohuattipi tiadenidsa ajima onajaro: Jonequiri tiquinadsa timadimanaji. Nahi madija ohuaha attidenipa: –Pohuadenipa bicaquiri nahi –quiquinanahijine, onajaro. Ia Medsede ccanihi huajira tahi.

<sup>6</sup>Huapima ticappiramananica tohuira tibodideni huatoto canajeraji. Ocasserani temanajarodsa naqui tibodideni huahuatomacca nejeraji. Ima huapima tibodidenidsa ahuatomadsa naqui Diodsara huati huati titiquina naji. Diodsa huatide tiquejenadsa naqui Pohuajine bica tanicca ticajimanani tibodideni huatonissa taji. Nadsapi Pohuadsa: –Jehe, Tijine bica tani –titiquina naji. <sup>7</sup>Nema tiquinadsapi Dio tiadenidsa pocca jonehe da inaridsanitohui, tibodideni jassi nanijine. Pocca jonehepi deni tojanicca. Madija iapi pocca jonehecca ima nemanehe iattanjine ipajira-jerani. Jesocristodsa tiquejenajaropi najaro jonehe tibodideni ecahua, tibodideni huatohue naqui ecahua najaropaji.

**Bica tanicca tohuira  
tibodideni huatoma-manaji**

<sup>8</sup>Ohuemecotedeni, jidacca huati onajarocca ima tadsajani ajima tinanamanaji: Ima pajissaccadsara

tibodideni huatoma-manaji. Imadinnissa tanijineccara tibodideni huatoma-manaji. Pajiranissa tanicca imatohuira tibodideni huatoma-manaji. Ima bicani ponira tiadenidsa tojaridsanjine tibodideni huatoma-manaji. Ima bica tanicca tohuira tibodideni huatoma-manaji. Madija pocca madie toccanissa tajaro tohuira tibodideni huatoma-manaji. Ima bicani pina Diocca imassa najaro tohuira tibodideni huatoma-manaji. Dio ticcadeni imadsa huatidsehijine tibodideni huatoma-manissa taji. <sup>9</sup>Aji tiadeni mari ocanabaquijaropi tiadenidsa tojaji. Tiadeni ocaodossebaquijaropi pina occa dossenijissa tinanamanaji. Pina occa ima timittamanajarossa tinanamanaji. Pina aji occa madie qqui tiquinajarossa tinanamanaji. Pina aji occa imassa tinanamandapsapi Diopa tiadeni jassi tonanabaquihitohui. Pohuana jonehe jinede. Tiadenidsa madiridsahi.

**Piripodsas madimanajaridenicca  
da naqqinaja Pablodsa**

<sup>10</sup>Ohuadsa tetideni huanana tajaroa ohua acco ticamamanapomadsapi ohua Medsededsa ohuatidsejaropaji. Ticcadeni da naqqinaja naqui ohuadsa bacco bacco najona-jeraraha maittadsama onihina ohuadsa bacco napomajarode. Ohuadsa tetideni ajimanani onejerajaro. Canajocossanadsa naqui nahato onajaro, ohua acco ticamamananjine tipajiramanajarode. <sup>11</sup>Tijinedeni ohuatidsenicca ima tiadenidsa huati onajaro. Naraha ocappirani, opajira-jerani onejerajaro. Ohuapi ohuatteje

najaro. Ocajidsa, ocappiradsa naqui obodi ohohuatidse najaro. <sup>12</sup>Occa madiejine badsira tehe ocajidsa naqui nahato onani. Sse onadsa naqui nahato onajaro. Ima onihi onihi ohuacatama-ridsajarojine ohuattajaro. Ojira onani. Accara onehe omadidsa, pemi omadidsa naqui ohuatteje najaro nahato onani. Mota tojahi ohuadsa anidsa naco nahato onajaro. Ocappirehe omadidsa naqui ohuatteje najaro nahato onani. <sup>13</sup>Cristo ohua tonadacoraja najarijine ima onihi onihi ohuadsa tojadsapi opajirani. <sup>14</sup>Naraha ocasserani ohuani nahatoto tinadsapi ohuadsa tetideni huanana tani. Diodsa da da tiquinajarocca ohuadsa ticcadeni da naqquinaja dosse tajonamanadsapi tijinedeni ohuadsa bica tani.

<sup>15</sup>Jesocristo tahimari icassiejera-nijinecca tiadeni mari ocanabaqqui-podsama tetidsemanadsa ohua acco acco ticamajonamanajaro. Dsama arobeni Masedoniahuaji ojoppemadsa naqui odsa onihicca Jesocristodsa quequeriqquimana najaridenipa ohua acco icamamanagerani. Naraha tiadeni Piripodsa titiqueriqqui najarodenina ohuadsa ticcadeni da naqquinaja da da tiquinajarode. <sup>16</sup>Odsa panani Tesaronicadsa omadidsa naqui occa madiejine ticcadeni da naqquinaja ohuadsa dosse tajonamanani ojari nejerade. <sup>17</sup>Ohuapi ticcadeni da naqquinaja tohuira obodi huatoni ojari nana onejerajaro. Ticcadeni biquehecca ima Diodsa tohuapinijinena jipa onajaro. Aji ticcadeni

da naqquinajapi Diopa qqui qqui tahi. Tiadenipi pina Dio Puhuadsa tidsepedeni ijimanajarossa najaro. Nadsapi Dio pocca biquehe tiadenidsa tojanitohui.

<sup>18</sup>Nadsama ticcadeni da naqquinajapi Epafrodito ahuaji eccajonajaro. Najarodsapi occa madiejine mita onaridsahi. Naraha mota tojaccani. Nadsama ohuadsa dosse tajonamanajaroipi Diodsa pina majojo majoni bica tajarossa najaro. Ohuadsa tijinedeni bica tadsapi Diodsa naqui bica tani. Nadsapa Dio tiadenidsa huatidsehi. <sup>19</sup>Nadsapa icca Dio ticappiramannicca tiadenidsa da da ihinananitohui. Jesocristocca tiquejenadsapi pocca biquehe, pohua cajijaricca huapima tiadenidsa inanajorajaro. <sup>20</sup>Abi Dio Bicabotepadeni tojahi. Etti nema dsanapunitohui. Huapima Puhuadsa etidse dsanapona, onajaro. Pajissa nema nana.

### Nija quinajari

<sup>21</sup>Jesocristodsa toquejenajarideni huapimadsa nija onajaro. Aja ohuemecotedeni ohuahuaji madimanajarideni naco tiadenidsa nija quinajari. <sup>22</sup>Aji ohua omadini Romahuajicca Jesocristodsa toquejenajarideni huapima, romanodennicca tamine deni tojahicca dodosse tabaqqi mota Jesocristodsa toquejenajarideni naco tiadenidsa nija quinajari. <sup>23</sup>Ia Medsede Jesocristopa tiadenidsa ima bicani inanana, onajaro.

Epejeni, ohua onipi Pablo.